

CONVIVENZA

Tge che la cudeschera n'ans di betg

PIEDER CAMINADA

Tutgais Vus tar la gliעד che chatscha en il nas dapertut? En Germania fasschais Vus lura part da la gruppa dals «Neugierige». En la part tudestga da l'Alsa-zia ed en parts da la Germania dal Sid vegn ins a numnar Vus «Wunderfitz». Ed en la Svizra tudestga? Qua essas Vus ina «Gwundernase».

A tgnamain tuna «Gwundernase» anc detg charin. Tuttina, las «Gwundernasen» na tutgan era qua tar nus betg tar ils contemporans ils pli apprezzads, essend ch'els dumondan ora tut nunschenadamain e vulan savair tut il pussaivel. Per rumantsch numn'ins tala gliעד perquai era pauc flattusamain «mirveglias cun set ureglias». Latiers vegn che quels umans mirveglius cun set ureglias na pon savens betg tegnair adascus insatge. Ed uschia daventa in carstgaun mirveglius spert er anc ina bucca nauscha.

Schebain jau sun ina bucca nauscha, ston auters giuditgar. Ina «Gwundernase» sun jau dentant gia adina stà – almain en la definiziun d'ina «persuna mirvegliusa». Gia d'uffant era jau detg interessà a tut – per formular a moda positiva mia predilecziun per dumondas da tuttas sorts. Tscha e là m'admoniva mia mamma schon che jau na duaja betg dumandar uschè



bler. Cumpareglia cun las autras «Gwundernasen» era e sun jau dentant in interrogatur plitost moderà.

Però hai era gia dà temps en mia vita, nua che mes bunder prendeva bainduras suramaun. Sche jau era pli baud envidà a tschaina u ad in magiel vin tar insatge che aveva ina collecziun da plattas da vinil, ma pudeva jau strusch retegnair. I m'interessava simplamain tge musica che mia envidadra u mes envidader aveva gugent. E sch'i deva en la collecziun da plattas che jau svutrava immediatamain la medema ubain sumeglianta musica che jau tadlava era gugent, na stueva jau betg tschertgar sfurzadamain in tema da conversaziun. Collecziuns da plattas na pon betg mo procurar per divertiment acustic, mabain era distatgar la lieunga.

Ma betg mo tar plattas bunder. Era cudescheras es-tras n'eran betg segiras da

mai. Jau vuleva adina savair tge che la gliעד legia. E daplì che mo ina giada hai jau tratg las faussas conclusiuns da mias retschertgas al lieu. Ina biblioteca privata n'è numnadamain betg ina cumprova quant sabi e cultivà ch'insatgi è. Tar tut quai na gioghi gnanc uschè ina rolla, schebain ins ha propi legi ils cudeschs sin curuna u sch'els èn be qua sco decoraziun.

Dal reminent, er en mia collecziun da cudeschs privata datti cudeschs che jau hai cumprà u survegni da regal gia avant decennis e che jau n'hai betg legi enfin oz. E perfin sche jau avess legi tut quels cudeschs nunlegids, na fiss quai anc nagina cumprova da gronda cultura. Ed insomma betg per cultura tras leger. Quella constataziun deriva da l'expert da dretg public e teolog laic svizzer Carl Hilty (1831–1909). Dad el è tradi in citat che relativescha perfetgamain la gronda cultura preschenta-da da blagun en bleras cudescheras: «La furmazion na vegn betg dal leger, mabain dal reflectar quai ch'ins ha legi.»

Pieder Caminada è creschi si a Glion en in ambient per gronda part tudestg e viva oz en il vitg rumantsch da Castrisch.

La convivenza da las linguas e culturas en il Grischun – quai è il tema da la rubrica «convivenza». Quella cumpara mintga gliendesdi en La Quotidiana ed en la Südstschweiz.